

Agid per mammas en grondas pitgiras

Otg fanestras a disposiziun per metter ora uffants

(anr) Questa stad èn gist duas saunas mattettas vegnidas messas or en la fanestra per babys – l'ina en il spital da Nossadunnaun e l'autra en il spital Lindenhof a Berna. Per Nossadunnaun, nua che questa fanestra è vegnida averta sco emprima en Svizra 2001, èsi il 13. uffant, a Berna il terz dad en tut 18 en Svizra. Dapi 2012 datti ina tala fanestra era en il spital da Tavau. En tut existan otg talas en tuttas regions linguisticas da la Svizra

Finanziadas vegnan questas fanestras (era numnadas letgs u cuccas) da l'Agid svizzer per mamma ed uffant, ina fundaziun ch'è cunter da stgatschar. (En Svizra datti onn per onn bler dapli che 10 000 stgatschadas – u ca. 40 mintga lavurdi.) Ils custs muntan a 10 000–20 000 francs il cas durant il temp per plazzar tar geniturs che tgeran fin l'adopziun.

I vegn sa gidà fitg

L'emprim surpiglia in avugà ils dretgs dals geniturs. Ils vairs geniturs pon pretender enavos lur uffant fin sia adopziun. Sch'ina mamma vul dentant avair contact cun ses uffant po ella s'annunziar tar

l'autorità da protecziun per creschids ed uffants (Kesb) e tar l'Agid svizzer per mamma ed uffant. En tutta discreziun vegni cusseglià, segirà agid material e finanziàl e tschertgà la meglra schliaziun per l'uffant.

Dapi ch'ins ha introduci quellas fanestras vegn constatà ch'adina damain uffants vegnan mess or u chattads morts.

Tge schabegia cun l'uffant en la fanestra?

La mamma, en ina situaziun desperada, po metter l'uffant anonimamain en mauns segirs. Ella avra la fanestra, metta l'uffant en il letg preparà, prenda la «Brev a la mamma» cun ella e s'absenta. Entaifer trais minutas datti alarm en la fanestra. Ina spendera vegn per l'uffant ed al tgera cun tut quità. Suenter insaquants dis vegn l'uffant tar geniturs per tgerar e pli tard tar geniturs adoptivs. Fin l'adopziun, che ha lieu sil pli baud in onn suenter che l'uffant è vegni dà giu, han ils geniturs il dretg da pretender enavos lur uffant. L'Agid per mamma ed uffant cusseglià da tut temp per ch'i giaja gea bain cun l'uffant.



Uschia vesa ina fanestra per metter en babys ora.